

**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ԿԵՆՏՐՈՆԱԿԱՆ ԸՆՏՐԱԿԱՆ ՀԱՆՁՆԱԺՈՂՈՎ**

03 հունիսի 2026թ.

N 227-Ա

Ո Ր Ո Շ ՈՒ Մ

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ԱԶԳԱՅԻՆ ԺՈՂՈՎԻ 2026 ԹՎԱԿԱՆԻ ՀՈՒՆԻՍԻ 7-Ի
ԸՆՏՐՈՒԹՅՈՒՆՆԵՐԻՆ ՄԱՍՆԱԿՑՈՂ «ԲԱՐԳԱՎԱՃ ՀԱՅԱՍՏԱՆ» ԿՈՒՍԱԿՑՈՒԹՅԱՆ
ԸՆՏՐԱԿԱՆ ՑՈՒՑԱԿՈՒՄ ԸՆԴԳՐԿՎԱԾ ՊԱՏԳԱՄԱՎՈՐԻ ԹԵԿՆԱԾՈՒ ԳԱՐՈՒՇ
ՄԱՐԶԵՑՅԱՆԻ ՆԿԱՏՄԱՄԲ ՔՐԵԱԿԱՆ ՀԵՏԱՊԵՆՏԻՆԻ ՎԵՐԱԲԵՐՅԱԼ
ՀԱՄԱՁԱՅՆՈՒԹՅՈՒՆ ՏԱԼՈՒ ՄԱՍԻՆ**

Հայաստանի Հանրապետության գլխավոր դատախազության Հայաստանի Հանրապետության հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության պետ Ա. Փանոսյանի կողմից 01.06.2026թ. թիվ 12/29/(18-5)-26 գրությամբ Հայաստանի Հանրապետության կենտրոնական ընտրական հանձնաժողով է ներկայացվել միջնորդություն՝ Հայաստանի Հանրապետության Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Գարուշ Սերյոժայի Մարզեցյանի նկատմամբ քրեական հետապնդում հարուցելու վերաբերյալ համաձայնություն ստանալու մասին:

Հայաստանի Հանրապետության կենտրոնական ընտրական հանձնաժողովը 2026 թվականի մայիսի 3-ին կայացրել է «Հայաստանի Հանրապետության Ազգային ժողովի 2026 թվականի հունիսի 7-ի հերթական ընտրություններին մասնակցելու համար «Բարգավաճ Հայաստան» կուսակցության ընտրական ցուցակը գրանցելու մասին» թիվ 66-Ա որոշումը:

«Բարգավաճ Հայաստան» կուսակցության ընտրական ցուցակի 74-րդ հերթական համարի պատգամավորի թեկնածու է գրանցվել Գարուշ Սերյոժայի Մարզեցյանը:

Կենտրոնական ընտրական հանձնաժողովի նիստին ներկայացել և մասնակցել է Հայաստանի Հանրապետության գլխավոր դատախազության Հայաստանի Հանրապետության հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության ավագ դատախազ Վերժինե Առաքելյանը:

Կենտրոնական ընտրական հանձնաժողովը՝ բավարարելով ՀՀ հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության ավագ դատախազ Վերժինե Առաքելյանի միջնորդությունը՝ նիստն անցկացրեց դռնփակ:

Կենտրոնական ընտրական հանձնաժողովն արձանագրում է, որ 2026թ. հունիսի 3-ի ժամը 19:00-ին կայանալիք արտահերթ նիստի վերաբերյալ Գարուշ Սերյոժայի Մարզեցյանը ծանուցվել է հեռախոսազանգի և հեռախոսահամարին հաղորդագրություն ուղարկելու միջոցով: 2026թ. հունիսի 3-ի ժամը 19:00-ին կայանալիք արտահերթ նիստի

վերաբերյալ հեռախոսազանգի միջոցով ծանուցվել է նաև «Բարգավաճ Հայաստան» կուսակցության լիազոր ներկայացուցիչ Իվետա Տոնոյանը:

Կենտրոնական ընտրական հանձնաժողովի նիստին ներկայացել և մասնակցել են նաև «Բարգավաճ Հայաստան» կուսակցության ընտրական ցուցակի պատգամավորի թեկնածու Գարուշ Սերյոժայի Մարգեցյանը և վերջինիս շահերը ներկայացնող փաստաբան Վահագն Բաբայանը (փաստաբանական գործունեության արտոնագիր N 503):

Փաստաբան Վահագն Բաբայանի կողմից ներկայացվեց միջնորդություն՝ նյութերին լիարժեք ծանոթանալու համար բավարար ժամանակ տրամադրելու, լսված լինելու իրավունքի արդյունվետ ապահովման, համաչափության սկզբունքի պահպանման մասին: Միջնորդությունը բավարարվեց, նիստն ընդմիջվեց և տրվեց ժամանակ՝ նյութերին ծանոթանալու համար: Նիստը վերսկսվեց 2026թ. հունիսի 3-ի ժամը 20:40-ին:

«Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Գարուշ Սերյոժայի Մարգեցյանի շահերը ներկայացնող փաստաբան Վահագն Բաբայանը հայտնեց, որ ներկայացված միջնորդությունն անհիմն է, մասնավորապես, միջնորդությանը կից ներկայացված նյութերում առկա չէ որևէ հիմնավորում՝ ինչու է միջնորդությունը ներկայացվում հիմա, վարույթն իրականացնող մարմինն ինչ կարևոր նյութեր է ձեռք բերել, որ քվեարկությունից չորս օր առաջ նման միջնորդություն է ներկայացնում: Եթե այս միջնորդությունը ներկայացվի քվեարկության օրվանից հետո՝ ինչով կտուժի արդարադատությունը: Փաստաբանը նշեց, որ իրենց մոտ ողջամիտ կասկած է, որ «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Գարուշ Մարգեցյանին քվեարկությունից չորս օր առաջ «շարքից հանում են», ինչը կազդի ընտրողների կամաարտահայտության վրա:

Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Գարուշ Մարգեցյանը ներկայացրեց իր կենսագրությունն ու գործունեությունը, հայտնեց, որ վայելում է ժողովրդի համակրանքը և նման միջնորդությունը կվարկաբեկի իր անունն ու հեղինակությունը:

Հայաստանի Հանրապետության գլխավոր դատախազության Հայաստանի Հանրապետության հակակոռուպցիոն կոմիտեում մինչդատական վարույթի օրինականության նկատմամբ հսկողության վարչության ավագ դատախազ Վերժինե Առաքելյանի կողմից ներկայացվեց Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Գարուշ Սերյոժայի Մարգեցյանի նկատմամբ քրեական հետապնդում հարուցելու վերաբերյալ համաձայնություն ստանալու մասին միջնորդությունը:

Սույն վարչական վարույթի շրջանակներում ուսումնասիրելով միջնորդությունը և կից ներկայացված նյութերը, ինչպես նաև լսելով վարույթի մասնակիցներին՝ Կենտրոնական ընտրական հանձնաժողովը գտնում է, որ Սահմանադրության 48-րդ հոդվածով երաշխավորված՝ պասիվ ընտրական իրավունքի իրացմանը խոչընդոտելու նպատակ

առկա չէ: Կենտրոնական ընտրական հանձնաժողովի գնահատմամբ՝ առկա չէ հանգամանք, որը հիմնավոր կփաստի քաղաքական դրդապատճառների առկայությունը:

«Հայաստանի Հանրապետության ընտրական օրենսգիրք» Հայաստանի Հանրապետության սահմանադրական օրենքի 90-րդ հոդվածի 5-րդ մասի համաձայն.

«5. Պատգամավորի թեկնածուի՝ մինչև պատգամավորի լիազորություններն ստանձնելն ընտրված պատգամավորի նկատմամբ քրեական հետապնդում կարող է հարուցվել միայն Կենտրոնական ընտրական հանձնաժողովի համաձայնությամբ: Առանց Կենտրոնական ընտրական հանձնաժողովի համաձայնության՝ նա չի կարող զրկվել ազատությունից, բացառությամբ, երբ նա բռնվել է հանցանք կատարելու պահին կամ անմիջապես դրանից հետո: Կենտրոնական ընտրական հանձնաժողովը նշված հարցի վերաբերյալ որոշում ընդունում է հանձնաժողովի անդամների ընդհանուր թվի ձայների առնվազն 2/3-ով: Սույն մասով սահմանված դրույթը չի տարածվում մինչև թեկնածու գրանցվելը ձերբակալված կամ կալանավորված քաղաքացիների, ինչպես նաև ձերբակալված անձի նկատմամբ կալանքը որպես խափանման միջոց ընտրելու և նշված անձանց կալանքի ժամկետը երկարաձգելու դեպքերի վրա:»:

Քննարկելով ներկայացված միջնորդությունը և ղեկավարվելով Ընտրական օրենսգրքի 90-րդ հոդվածի 5-րդ մասի պահանջով՝ Հայաստանի Հանրապետության կենտրոնական ընտրական հանձնաժողովը

Ո Ր Ո Շ ՈՒ Մ Է.

1. Միջնորդությունը բավարարել՝ տալ համաձայնություն Հայաստանի Հանրապետության Ազգային ժողովի 2026 թվականի հունիսի 7-ի ընտրություններին մասնակցող «Բարգավաճ Հայաստան» կուսակցության ընտրական ցուցակում ընդգրկված պատգամավորի թեկնածու Գարուշ Սերյոժայի Մարգեցյանի նկատմամբ քրեական հետապնդում հարուցելու վերաբերյալ:

2. Սույն որոշումն ուժի մեջ է մտնում նիստում հրապարակելու պահից:

3. Սույն որոշումը կարող է բողոքարկվել Հայաստանի Հանրապետության վարչական դատարան՝ օրացուցային երեք օրվա ընթացքում:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԿԵՆՏՐՈՆԱԿԱՆ ԸՆՏՐԱԿԱՆ
ՀԱՆՁՆԱԺՈՂՈՎԻ ՆԱԽԱԳԱՀ**

Վ. ՀՈՎԱԿԻՄՅԱՆ

2026 թվականի հունիսի 03
ք. Երևան